



Meeqqat, inuusuttullu akornanni naqinnernik ilisarinnissinnaangitsut aamma atuarnermik allannermillu ajornartorsiuteqartut pillugit nuna tamakkerlugu iliuusissanik aalajangiiffigisassaattut siunnersuut.

(Inatsisartunut ilaasortaq Sofia Geisler, Inuit Ataqatigiit)
(Siullermeerneqarnera)

Naqinnernik ilisarsisinnaangitsunut Kalaallisut programimik ikiuutinik sanasoqarsinnaanissaa pillugu nalunaarusiamik Naalackersuisut suliaqaqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Aslak W. Jensen, Siumut)
(Siullermeerneqarnera)

Inatsisartut isummerfigisassaattut siunnersuut Naalackersuisut peqquneqassasut kalaallisuumik naqinnernik ilisarinnissinnaangitsunut misissuummik ineriartortitsisoqarlunilu atuutilersitsisoqarnissaannik meeqqat atuarfianni ilinniarfinnilu ingerlariaqqiffiusuni atorneqartussatut.

(Inatsisartunut ilaasortaq Nivi Olsen, Demokraatit)
(Siullermeerneqarnera)

Demokraatit nuannaarutigisorujussuullugulu qujamasuutigisorujussuaat siunnersuutit uku pingasut aalajangiiffigisassanngortinneqarmata, tamarmik siunertaraat, meerartatta inuusuttuarartagulli siunissami Meeqqat atuarfianni periarfissaannik pitsaanerulersitsiniarnermik anguniagaqarfiusut. Tamanna aaqqissuusseqqinnerit pisariaqartut ilagaat, qulakkeerniarlugu, siunissami meeqqat inuusuttullu sattattumik siunissaqannginnissaat.

Ukiuni kingulliunerusuni paasisimavarput, inuusuttut amerlavallaat, sulinatillu ilinniagaqanngitsuusut. Taamaattumik qujanarujussuaq siunnersuuteqartunut, taamatullu innarluutillit illersuisuata suliai meeqqallu pisinnaatitaaffi atorlugit, pisariaqartunik sakkusanik pilersitsiniarneruvoq, uagut politikkerit sinaakkusiinnaassagatta, meerartatta inuusuttuarartalu meeqqat atuarfianni aammalu inuiaqatigiinni akuutitaanissaannut. Pitsaasumik meeqqat atuarfianni atuarneq ilinnialernissaannut suliffeqalernissaannullu toqqammavissanik pitsaasunik pilersitsissaaq.

Nunap, sukkaoorujussuarmik ineriartortup, innuttani tamaasa pisariaqartippaa suleqataanissamut, peqataanissamut akisussaaqataanissamullu inuiaqatigiit ineriartornerannut. Taamaattumik uagut aaliangiisartutut, ”angajoqqaatullu akisussaasutut” qulakkiissavarput, meerartagut inuusuttagullu inuunermi iluatsittumik pitsaanerpaanik atugaqartinnissaat. Suliaq annertuvoq, uani suliassaq naammassissassarlu siunnersuutip imarisaanut tunngatillugu aammalu Naalackersuisut akissutaannut tunngatillugu. Taamaattumik sukumiisumik suliarisassaavoq, suliap ingerlateqqinnerani siunnersuuteqartut



pingasut kissaataat tusarnaassallugit. Taamatut oqaaseqaateqariarlunga, siunnertuutit ataasiakkaarlugit oqaaseqarfigissavakka.

Imm. 29

Inuit Ataqtigiinniit siunnersuuteqartup tikkuarpaa suliaq una, ajoraluartumik ukiorpassuit matuma siorna unittoorsimasoq. Soorunalumi uagut Demokraatinik aamma uggoraarput. Pingaartumik Naalakkersuisunit ilisimaligarput nalunaarutigineqartoq, naqinnernik ilisarinnissinnaanngitsunut misissuummik pisariaqartumik kalaallisuumik sananissamat piffissap qanoq sivilutigissanera aammalu atortuulersinnissaa sivilullunilu akisuujussasoq. Taakkulu utaqqinerini isiginnaaginnavagut, meeqqat atuarfianni meeqqat inuusuttullu pisariaqartitsisut pitsanngoriannginnerat. Taamaattumik siunnersuuteqartumut qujavunga, uani suliaq "pisoqalisoq" naammassineqanngitsorlu saqqummiuummagu, taamaasilluta tamatta isummersorfigisinnaassagatsigu.

Imm. 47

Siumumiit siunnersuuteqartup suliamut attuumassuteqartut iserfigai meeqqanut nappaatip suussusianik paasineqarsimasunut tunngassuteqartut piviusorlu imaappoq, naak immikkut pisariaqartitsigaluarlutik atuaqtigiinni klassimi nalinginnaasumi atuarinneqartarlutik. Siunnersuuteqartup atuarfik ataaseq assersuutitut atorpaa, taassuma atuartut qallunaatoortunik ikiorsiissutinik atorluni ikiorsinnaasimagai, taamaaliornermili atuartut kalaallisuinnaq oqaasillit eqqarsaatigineqanngillat, aammalu taamaaliornikkut meeqqagut naligiinngitsumik periarfissinneqarlutik. Atuarfiup ataasiinnap assersuutitut atorneqarnerata aamma kinguneraa, apeqqusernarmat tamanna nunatsinni atuarfinnut tamanut neqeroorutaanersoq.

Imm. 73

Demokraatit siunnersuuteqartup uani naqinnernik ilisarinnissinnaanngitsunut pisariaqartumik kalaallisut misissuummik ineriartortitsinissamik sakkussanik pilersitsinissamat periarfissat sukumiisumik taakkartorpai. Taamaaliornermigut atortussat ineriartorteqqinnissaannut tunngavissamik pitsaasumik tunisivoq, ineriartortsitsineq ukiuni arlalinni sivilussuseqartussatut paasineqarpoq. Taamaattumik Demokraatit annertuutik uggoraat, taama sivilutigissamat. Utaqqiisaa imaattussaamat, meeqqat eqqorneqartut ikiorneqarnissartik pisariaqartoq pissanngikkaat. Taamaattumik isumaqarpugut, misissuut maannamat pioreersoq annertusineqartariaqartoq nunatsinni atuarfinni tamani, utaqqinitsinni atuarniarnermikkut allanniarnermikkullu ajornartorsiuteqartunik "meeqqanik katatsinnginnissarput" qulakkeerussullutigu.

Aammattaq isumaqarpugut, atulersitsineq annertunerusumik ukkatarisariaqarippat, klassinimi nalinginnaasuni amerlanerusuni meeqqanik inuusuttunillu immikkut pisariaqartitsisunik atuortoqarpoq. Nunatsinni ilinniartitsisunut kivitassaq annertoorujussuuvoq taamaattumillu soorunami isumaqarpugut, nunatsinni ilinniartitsisut suleqatigiillutik atorfissaqartitamik pisariaqartut pigissagaat ilinniartitsinermut atortussanut nutaassamat atulersitsinissamat. Isummersuutit tunngavigalugit ersarippoq, pilersaarut ima issasoq, suliaasaqarfiit akimorlugit suleqatigiinneq pisariaqassalluni iluatsilluarnissaanullu apeqqutaalluinnassalluni. Taamaattumik iluassagaluuaqaaq, inuussutissarsiortunik namminersortumik suleqateqarsinnaaneq ammaffigineqarpat meeqqat atuarfianni meeqqat inuusuttullu atugaasa pitsanngorsarnissaanut immikkut suliniarneq piviusunngortinneqassappat.

Taamatut oqaaseqarluta Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliaq siunnersuutit pingasut suliarineranni aammalu Naalakkersuisut akissutaasa suliarineranni



sulilluarnissaannik kissaappagut. Qilanaaraarput, isumaliutissiissut qanoq imaqarumaassanersoq siunnersuutip aappassaaniinginnerani.